



## Terenga 2: Hōtaka 01 – Ngā Ture o Te Reo Māori

Kei ngā mōtoi kahotea o roto i ngā iwi puta noa i ngā motu nei, rarau mai anō ki tā tātou hōtaka e whāngai nei i ētehi āhuatanga o te reo Māori hei wānanga mā te hirikapo.

Piki mai, kake mai anō ki te terenga tuarua o AKO.

Mehemea he tuatahi tēnei ki a koe, nau mai. Mehemea e auraki mai nei koe ki te hiki anō i te hoe – tēnā anō rā koe e te manawa piharau!

### He Whakamārama

Ka whai tonu tātou i te taura o tō te waka terenga i runga i te moana. I te wāhanga tuatahi ka rewa te waka. Hei konei whakakoikoihia ai ngā pūkenga whakarongo, matapaki anō hoki, hei whakatau i te horopaki mō tā tātou akoranga. I te wāhanga tuarua ka tere te waka ki tai. Hei reira rukuha ai ngā moana o Rerenga Kōrero kia mōhio ai tātou ki ngā wāhanga me whakaaro ake kia tika ai te rere o te kupu.

I te wāhanga tuatoru ka ū te waka ki uta. Māku e tuku atu tētehi mahi hei whakaū i te whakatakotoranga o te rā. Kua tāpirihia he wāhanga hou ki ā tātou hōtaka hei manatu mā tātou. Ka whārikihia e au ētehi hapa e rangona whānuitia ana me kore ake e taea e tātou te whakatikatika kia Māori ake ai ā tātou whakapuakanga kōrero.

### Hei Mahi Whakarongo

Tēnā mātakitakihia te kiriata poto mō tēnei rā. Anei ngā pātai hei whakautu mā koutou: Whakarongo ki ngā whakautu a ngā ākonga i roto i te Wāhanga Tuatahi o te hōtaka.

1. He aha te roanga o te whakataukī?
2. Nā wai ia i tono ki te tito whakataukī?
3. Hei tāna, me aha e eke ai te reo ki ōna taumata?

### Hei Manatu

Ko te kupu 'taea' te kupu hei manatu mā tātou i te rangi nei.

Ka taea ki te... x

Ka taea he... x

Ka taea te kitea x

Ka taea te... ✓

Kotahi te kōrero e tika ana o ēnei rerenga ka rangona e te taringa.

Ka noho hāngū te kupu 'taea' ahakoa pēwhea. Ko te mahi ka taea e te tangata ka noho i muri mai i te kupu 'te'. Kāore te kupu hāngū e noho mai ki muri i te 'taea'. Mehemea he kaimahi, ka noho tēnā ki muri i te kupu 'e'. Ko te tikanga, kāore he pū 'i', 'ki' rānei hei tūhono i ngā wāhanga o tēnei rerenga.

Wānangahia ētehi taura rerekē kia tangata whenua ai tēnei whakatikahanga ki roto i te hinengaro.

Hei taura:

Ka taea e tātou ō tātou hapa te whakakore.

### Hei Mahi

Whakamāorihia ēnei rerenga:

1. Can you see that mountain?
2. Are you able to help me?
3. We can learn many new words.
4. What can we do?

### Whakautu:

1. Ka taea e koe tērā maunga te kite? / Ka taea e koe te kite tērā maunga?
2. Ka taea e koe ahau te āwhina?
3. Ka taea e tātou te ako ngā kupu maha. / Ka taea e tātou ngā kupu maha te ako.
4. E taea ana e tātou te aha?